

आकाशवाणी
Dogri Evening
(NSD) Bulletin

28-05-2026

खबरां

- कर्नाटक दे मुखमंत्री सिद्धारमैया होरें लोकभवन च गवर्नर हुंदे सचिव होरें गी अपना इस्तीफा सौंपेआ।
- केंद्री मंत्री अमित शाह होरें गैर कनूनी तौरा पर रवा'रदे प्रवासिएं दी पंछान करने ते देश थमां उनेंगी बाहर कडुने दी प्रतिबद्धता गी दोहराया।
- भारती जनता पार्टी दे राष्ट्री नेतृत्व नै मौजूदा विधायक अभिशोक देब्रोय होरें गी भाजपा-त्रिपुरा प्रदेश इकाई दा नमां अध्यक्ष नियुक्त कीता।
- प्रधानमंत्री नरेंद्र मोदी होरें स्लोवेनिया दे प्रधानमंत्री चुने जाने पर जनेज जानशा होरें गी मुबारक दितीं
- उभरदे तकनीकी रूझानें लेई सिखने आलें गी बेहतर तरीके कन्नै सुसज्जित करने लेई आर्टिफिशल इंटेलीजेंस पाठ्यक्रम च व्यापक ओवरआल लेई उद्योग कन्नै सरकार किट्टे रलियै सहयोग करा'रदी ऐ।
- बैडमिंटन च पी.वी सिंधु ते लक्ष्य सैन अज्ज सिंगापुर ओपन दी जित्त कन्नै पेहले गै क्वार्टर फाइनल च पुज्जे न।

<><><><><><>

Karnatka CM

कर्नाटक दे मुखमंत्री सिद्धारमैया होरें अज्ज लोकभवन च राज्यपाल सचिव हुंदे कश अपना औपचारिक तौरा पर इस्तीफा सौंपेआ ऐ। मीडिया गी संबोधित करदे होई उनें इस गल्लै दी पुष्टि कीती जे इस्तीफा पत्र अधिकारिक तौरा पर सचिव होरें गी सौंपी दित्ता गेआ ऐ। सिद्धारमैया होरें अगगे आखेआ जे ओहू नियुक्त मुखमंत्री होरें गी औहदेदारी संभालने लेई सहन, कीजे उंदी सरकार गी विधानसभा च 136 शा मते विधायकें दे समर्थन कन्नै पूर्ण बहुमत हासल ऐ। विधानसभा चुनावं च कांग्रेस दे जित्त हासल करने मगरा सिद्धारमैया मई 2023 च दुई बारी कर्नाटक दे मुखमंत्री बने हे। इस थमां पैहले उनें 2013 थमां 2018 तगर मुखमंत्री दे तौरा पर कमान सांभी ही।

<><><><><><>

Amit Shah Gujarat

केंद्री गृह ते सहकारिता मंत्री अमित शाह होरें मुख च गैर कनूनी तौर पर रवा'रदे विदेशी नागरिकें दी पंछान करिए उनेंगी वापस भेजने प्रति सरकार दी बचनबद्धता फही दोहराई। गांधी नगर लोकसभा हल्के च 340 करोड़ रपे दे विकास कम्में दा नीहू पत्थर रक्खने ते उद्घाटन करने मगरा आक्खी। शाह होरें आखेआ जे सरकार बन्ने दी राखी हिफाजत प्रति बचनबद्ध ऐ। अपने संबोधिन च

गृह मंत्री होंरें पच्छिम बंगाल सरकार आसेआ इक हफते दे अंदर-अंदर 600 हैक्टर जमीन सीमा सुरक्षा बल गी मुंतकिल करने लेई उनेंगी मुबारकबाद दिती।

<><><><><><>

Tripura BJP President

भारती जनता पार्टी दे राश्ट्री नेतृत्व नैफोरन असरदार तरीके कन्नै बीजेपी त्रिपुरा प्रदेश इकाई दे नमें अध्यक्ष दे तौरा पर मौजूदा विधायक अभिषेक देब्रोय होंरें गी नियुक्त कीता ऐ। देब्रोय राज्यसभा सांसद राजीव भट्टाचार्य हुंदी थाहर आए न जिनें 2022 थमां 2026 तगर राज्य पार्टी दे अध्यक्ष दे तौरा पर कम्म कीता हा। 28 मई 2026 गी बीजेपी दे राश्ट्री महासचिव अरूण सिंह हुंदे आसेआ जारी कीती गेदी इक अधिकारिक अधिसूचना मूजब इस नियुक्ति गी बीजेपी दे राश्ट्री अध्यक्ष नितिन नबीन होंरें अखीरी रूप दिता हा।

<><><><><><>

PM-Slovenia

प्रधानमंत्री नरेंद्र मोदी होंरें स्लोवोनिया दे प्रधानमंत्री दे तौरा पर चुने जाने पर जनेज जानशा होंरें गी मुबारकबाद दिती ऐ। सोशल मीडिया पोस्ट च मोदी होंरें आखेआ जे ओहू स्पीकर दोनें मुखें दी सांझी समृद्धि ते आपसी हितें लेई दपक्खिया रिशतें गी होर मजबूत करने लेई स्लोबेनिया दे प्रधानमंत्री हुंदे नै रलियै कम्म करने लेई बेसब्री कन्नै इंतजार करा'रदे ना।

<><><><><><>

Speaker

लोकसभा अध्यक्ष ओम बिरला होंरें आखेआ ऐ जे लोकतंत्र संवाद, बहस, सहमति ते असहमति पर बददा मठोंदा ऐ। दिल्ली विधनसभा च 1924 थमां 1930 तगर केंद्री विधानसभा दी सब्भनें 407 बैठकें दी कार्रवाई दा इक अनोखा 89 खंडें दा संकलन जारी करदे होई बिरला होंरें आखेआ जे एहू संग्रह औने आहली पीढ़ियें ते लोकतांत्रिक संस्थाएं लेई इक अनमुल्ले मार्गदर्शक दे तौरा पर कम्म करोग।

<><><><><><>

CUET-NTA

राश्ट्री परीक्षा एजेंसी-एनटीए नै सांझे विश्वविद्यालय प्रवेश परीक्षा सी.यू.ई.टी-यू.जी 2026 परीक्षा दियां संशोधित तरीकां ते प्रवेश पत्र जारी करी दित्ते ना। एनटीए मूजब स्तेहान हुन 31 मई 6 ते 7 जून गी आयोजित कीते जाडन। अज्ज होने आहला स्तेहान ईद-उल-अजहा करी पुननिर्धारित कीता गेआ हा। एनटीए नै दस्सेआ ऐ जे ऐतवारें स्तेहान देने आहले मेदवारें दे प्रवेश पत्र जारी करी दित्ते गए न ते इनेंगी एनटीए दी आधिकारिक वेबसाइट cuet.nta.nic.in थमां डाउनलोड कीता जाई सकदा ऐ। 6 ते 7 जून गी स्तेहानें देने आहले बाकी रौहंदे मेदवारें गी प्रवेश पत्र तौले गै जारी करी दित्ते जाडन।

<><><><><><>

Prez. Sikkim

राष्ट्रपति द्रौपदी मुर्मू होंरें सिक्किम गी पूर्ण साक्षर राज्य घोशित कीता। गंगटोक च आयोजित सिक्किम विश्वविद्यालय दे दीक्षांत समारोह च राष्ट्रपति होंरें एह घोशणा कीती गई। केंद्र दी समाज च सारें आस्तै आजीवन शिक्षा दी समझ ते खुशी पैहल तैहत एह घोशणा कीती गई ऐ। एह सिक्किम आस्तै इक होर महत्वपूर्ण उपलब्धि ऐ ते मुखमंत्री प्रेम सिंह तमांग हुंदी दूरदर्शी अगुवाई च शैक्षिक सशक्तिकरण ते समावेशी विकास प्रति राज्य दी अटूट प्रतिबद्धता गी दर्शादी ऐ।

<><><><><><>

Bihar-Tragedy

बिहार च राज्यभ च भारी बढ़ल गरजने, बिजली पौने ते अंधी-झक्खड़ करी 8 लोकें दी मौत होई गई। इस बश्कार मुंगेर, भागलपुर, पूर्वी चम्पारण ते पच्छिम चंपारण च इक-इक जने दे मरने दी खबर ऐ। मुखमंत्री सम्राट चौधरी होंरें इस जानमाल दे नुकसान पर बसोस बुझेआ ऐ ते मरने आहलें दे नेड़में सगे संबंधिएं गी 4-4 लक्ख रपे दी सिंधी सहायता देने दी घोशणा कीती ऐ।

<><><><><><>

PM -Pragati

प्रधानमंत्री नरेन्द्र मोदी होंरें “स्वच्छ भारत” मिशन दे दुए गेड़ गी असरदार ढंगै सिर लागू करने दी जरूरतै पर जोर दिंदे होई आखेआ ऐ कि एह अभियान ना छड़ा बुनियादी ढांचे दे निर्माण तगर सीमित रौहना लोड़चदा संगुआ एहदे पर बकायद’गी कन्नै निगरानी- लोकें कन्नै जुड़ना ते सहयोग ते बक्ख-बक्ख पक्खें कन्नै तालमेल बनाइयै एहदे निगर-ठोस नतीजे जकीनी बनाए जाने लोड़चदे। नमीं दिल्ली च 51मीं प्रगति बैठक गी सम्बोधित करदे होई प्रधानमंत्री होंरें राज्यें गी कूड़े-कचरे दे सेही चाल्ली प्रबंधन कन्नै जुडी दिएं परियोजनें जियां वेस्ट प्रॉसेसिंग- गोबर-धन संयंत्रें दा निर्माण वगैरा दे कम्मै च तेजी आहलने दी जरूरतै पर जोर दिता। बैठका च प्रधानमंत्री होंरें 9 राज्यें च रेलवे- बिजली ते सिड़क क्षेत्रें च लगभग 30 ज्हार करोड़ रपे दी लागत आहलियें बुनियादी सेवाएं- सुविधाएं दिएं 7 महत्वपूर्ण परियोजनाएं दी समीक्षा कीती। मोदी होंरें शैहरी इलाकें- रिहायशी परिसर ते सार्वजनिक संस्थानें पर सोलर पैनल लाने गी बढ़ावा देने पर जोर दिता। उ’नें आक्खेया कि एहदे नै बिजली दी लागत घट्ट होग- ऊर्जा दी बचत होग- ऊर्जा सुरक्षा बधोग ते स्वच्छ ऊर्जा गी प्रोत्साहन थहोग।

<><><><><><>

Iran-Guards

ईरान दे क्रांतिकारी गार्ड नै अज्ज आखेआ ऐ जे बंदर अब्बास ब्हाई अड्डे दे कोल अमरीकी हमलें दी जवाबदेही च अज्ज बडुलै इक अमरीकी अड्डे गी निशाना बनाया ऐ। तेहरान नै उस अड्डे दी थाहर दा खुलासा नेई कीता ऐ जेदे पर हमला कीता गेआ हा पर अमरीकी सहयोगी कुवैत नै पैहले गै आखेआ हा जे ओहू शत्रुतापूर्ण मिसाइल ते ड्रोन हमलें दा परता देआ’रदा ऐ।

<><><><><><>

Vaishnav AI

सरकार उभरदे तकनीकी रूझाने लेई सिक्खने आलेंगी बेहतर तरीके कन्नै सुसज्जित करने लेई आर्टिफिशल इंटेलीजेंस पाठयक्रम च व्यापक तब्दीली लेई उद्योग क्षेत्र कन्नै सहयोग करा करदी ऐ। इस सरबंधे च इलैक्ट्रानिक्स ते सूचना प्रौद्योगिकी मंत्री अश्विनी वैशणव होरें अज्ज नमीं दिल्ली च ए.आई गतिविधियें सरबन्धी टास्कफोर्स कन्नै उच्च स्तरीय बैठक कीती। इस दरान चर्चाएं च उद्योग अकादमी सहयोग गी मजबूत करने ते ए.आई शिक्षा गी भविक्ख दी तकनीकी जरूरतै कन्नै तालमेल बनाने पर जोर दिता गेआ।

<><><><><><>

Savarkar

अज्ज महान राष्ट्रवादी ते स्वतंत्रता सेनानी विनायक दामोदर सावरकर हुंदी जयंती ऐ जिनेंगी लोकप्रिय तौरा पर वीर सावरकर आखदे न। इस मौके पर प्रधानमंत्री नरेंद्र मोदी ते गृह मंत्री अमित शाह होरें महान नेता होरें गी चेत्ता कीता। प्रधानमंत्री मोदी होरें अपने स्नेह च आखेआ जे वीर सावरकर हुंदी हिम्मत ते देशभक्ति म्हेशा लोकें गी प्रेरित करग। गृह मंत्री होरें आखेआ जे आजादी संग्राम दे इक निडर योद्धा वीर सावरकर होरें अपनी पूरी जिंदगी मातृभूमि दी सेवा च समर्पित कीती।

<><><><><><>

Eid-UI-Azha

ईद-उल-अजहा अज्ज देशै दे बक्ख-बक्ख हिस्सें च पूरे धार्मिक जोश ते खुशी दे कन्नै मनाई जा'रदी ऐ। इसी बकरीद बी आखेआ जंदा ऐ। बडुलै थमां गै मसीतें ते ईदगाहें च बशेश नमाज़ लेई श्रद्धालू पुजा करदे न। राष्ट्री राजधानी दिल्ली च जामा मस्जिद- फतेहपुरी मस्जिद ते शाही ईदगाह च ईद दी मुख्व नमाज़ अदा कीती गेई। इस मौके पर सुरक्षा दे निगगर बंदोबस्त कीते गेदे न तां जे ध्यार शांतिपूर्ण ढंगै नै सम्पन्न होऐ ते कनून बवस्था बी बनी दी रवै। तोंआई जम्मू-कश्मीर च ईद दा ध्यार कल मनाया गेआ। ऊआं प्रदेश च अज्ज बी ईद दे ध्यार दा जश्र मनाया जा करदा ऐ। राष्ट्रपति द्रौपदी मुरमू ते प्रधानमंत्री नरेन्द्र मोदी होरें ईद-उल-अजहा दे मौके पर देशवासियें गी बधाई दिती ऐ। अपने संदेश च राष्ट्रपति होरें आखेआ जे एह ध्यार भक्ति- त्याग ते निस्वार्थ भावना दा प्रतीक ऐ। उ'नें आखेआ जे एह ध्यार नागरिकें गी मनुक्ख –जाति ते खासकरियै वंचित लोकें दी सेवा करने लेई प्रेरित करदा ऐ। उ'नें नागरिकें गी समाज च हिरख-प्रेम ते सदभाव गी बढावा देने दे संकल्प गी मजबूत करने दी गुज़राश कीती। उपराष्ट्रपति ते प्रधानमंत्री होरें बी लोकें गी इस पवित्र मौके पर शुभकामनां दितियां। उपराष्ट्रपति होरें सोशल मीडिया दी इक पोस्ट राएं मेद जाहिर कीती जे एह त्योहार सब्भनें लेई खुशी- शांति ते रमानदारी लेइयै आवै। प्रधानमंत्री नरेन्द्र मोदी होरें अपने सनेह च मेद जाहिर कीती जे एह त्योहार भाई-चारे दिएं तंदें गी मजबूती देग ते समाज च खुशिया लेइयै औग। उ'नें सब्भनें दी खुशहाली दी कामना कीती।

<><><><><><>

Prez. Sikkim Flag

